

इवनिंग डोगरी न्यूज़ बुलेटिन

समे .18:15 Hrs

<><><><><><>

Headlines

1. मुखमंत्री उमर अब्दुल्ला होरें सुप्रीम कोट थवां मेद जाहिर कीती ऐ जे राज्य दा दर्जा परतियै बहाल करने आस्तै ओह समें-सीमा तय करोग।
2. पुंछ जिले आहली कब्जा रेखा कन्नै लगदे इलाकें च केई सारे ड्रोन दिक्खे जाने मगरा सुरक्षाबलें तपाशी अभियान रम्भ कीता ऐ।
3. जल शक्ति मंत्री जावेद राणा होरें उड़ी च जेहलम दरेया दे कंडे उनें थाहरें जित्थे हाड़ औने दी शेंका बनी दी रौहंदी ऐ, उत्थे हिफाजत सरबंधी कम्में दा नीह पत्थर रक्खेआ।
4. संवेदनशील आंकड़ें दी हिफाजत यकीनी करने लेई जम्मू-कश्मीर सरकार नै सारे मैहकमें गी यूएसबी ते पेन ड्राइव्स दे इस्तेमाल पर पाबंदी लाने दा हुक्म जारी कीता ऐ।
5. मौसम विभाग नै 27 अगस्त तगर भारी बरखा पौने, बदल फट्टने, चान-चक्क हाड़ औने ते ल्हास-पस्सियां पौने दी पेशगोई कीती ऐ। जम्मू खिते दे सारे स्कूल कल बंद रौहडन।

<><><><><><>

CM-Statehood

मुखमंत्री उमर अब्दुल्ला होरें आखेआ ऐ जे जम्मू-कश्मीर दा राज्य दा दर्जा बहाल करने आस्तै सुप्रीम कोर्ट गी इक समें सीमा तय करनी लोइचदी। उनें आखेआ जे मंदे भागें आहली गल्ल ऐ जे संवैधानिक पीठ 10 अक्तूबर तगर इस मामले पर सुनवाई लेई तैयार नेई ऐ। इक कार्यक्रम मगरा मीडिया कर्मिण गी संबोधित करदे होई मुखमंत्री उमर अब्दुल्ला होरें आखेआ जे अस मेद करने आं जे अदालत इक समें-सीमा तय करोग ते असेंगी राज्य दा दर्जा तौले गै हासिल होग। उनें आखेआ।

एहदे थवां पैहले मुखमंत्री होरें श्रीनगर दे एस.के.आई.सी.सी च उनें समुदायें गी सशक्त बनाने ते सब्बन दे कल्याण सरबंधी कार्यक्रम च हिस्सा लैता। उनें प्रदर्शनी दा उद्घाटन कीता। उनें महिलाएं ते बे-गौरे समूहें लेई लोन गी मंजूरी दिती। मुखमंत्री होरें आखेआ ऐ जे सरकार दा नजरिया दान थवां बदलिए हक आधारित कल्याण पर ऐ।

<><><><><><>

Udh. Awareness Prog.

समाज कल्याण मैहकमे उधमपुर आसेआ अज्ज डी.सी दफ्तर परिसर च जागरूकता शिविर दा आयोजन कीता गेआ। एह कार्यक्रम अज्ज श्रीनगर च आयोजित उस्सै कार्यक्रम दी पछौक्कड़ै च हा जेदे च मुखमन्त्री उमर अब्दुल्ला होरें शिरकत कीती। इस दरान समूलचे जम्मू-कश्मीर च 547 3 टैयरें आहले ट्राई साइकिल बी बंडे गे। उधमपुर च आयोजित कार्यक्रम च डी.सी सलोनी राय होर मुख परौहनी हियां। एहदे अलावा सब्बै 4 विधायक बी इस मौके पर उत्थे मौजूद हे। उधमपुर जिले च तकरीबन 23 मोटर कन्नै चलने आहलियां 3 टैयरें आहलियां ट्राइसाइकिल दिव्यांग लोकें गी बंडडियां गेइयां। इस मौके पर बोलदे होई उधमपुर दियां डिप्टी कमिशनर सलोनी राय होरें आखेआ।

<><><><><><>

Drones-Sighted

पुंछ जिले च कब्ज़ा रेखा दे नेड़े आहले अगेत्रे इलाकें च तकरीबन अद्दा दर्जन पाकिस्तानी ड्रोन दिक्खने जाने दे बाद सुरक्षाबलें उत्थे अज्ज इक बड्डा तपाशी अभियान चलाया ऐ। आकाशवाणी दे जम्मू संवाददाता दी रिपोर्ट मूजब, जंदी रातीं जिले दे मेंढर सैक्टर च गुरसाई नाला, लंगोट ते बालाकोट इलाकें च एह ड्रोन दिक्खे गे। मन्नेआ जा'रदा ऐ जे एह ड्रोन, किश चिरै लेई भारती इलाके च डुआरी भरने मगरा बन्ने पार वापस चली गे। अज्ज बड्डलै लोऽ हुं'दे गै सुरक्षाबलें पूरी इलाके दी घेराबंदी करियै उत्थे तपाशी अभियान रम्भी दिता तांजे इस गल्लै दा पता लाया जाई सकै जे इ'नें ड्रोन दे राहें कुतै कोई थेआर जां नशीले पदार्थ ते इस बक्खी नेई सुट्टे गे।

<><><><><><>

Rana Foundation Stone

जल शक्ति मंत्री जावेद अहमद राणा होरें हाईं दे प्रबंधन सरबन्धी प्रोग्राम तैहत बोनियार उड़ी च हाईं ते उपजाऊ मिट्टी दी सतह गी रूढ़ने थमां बचाने सरबन्धी कम्मै दा नीह पत्थर रक्खेआ। इनें थाहरें पर दिवारां ते फिहाजत सरबन्धी ढांचे बनाए जांगन जेदे राएं दर्जन भर ग्रामीणों गी हाईं थवां बचाया जाई सकोग। एहदे कन्नै लोकें ते जमीन दी हिफाजत यकीनी बनोग ते उनेंगी लाह हासिल होग।

<><><><><><>

PM-MKB

प्रधानमंत्री नरेन्द्र मोदी होर 31 अगस्त ऐतवार दिनें 11 बजे अपने माहवार रेडियो कार्यक्रम “मन की बात” दे राएं देश-बदेश च रौहने आहले लोकें कन्नै अपने बचार सांझे करडन। एह इस कार्यक्रम दी 125मीं किशत होग जेहदा प्रसारण आकाशवाणी ते दूरदर्शन दे समूलचे नेटवर्क दे कन्नो-कन्नी आकाशवाणी खबरें दी वेबसाइट ते न्यूज़ ऑन ए.आई.आर मोबाइल ऐप ते डीडी न्यूज़, आकाशवाणी न्यूज़,

प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाहग। आकाशवाणी जम्मू आसेआ मन की बात दे तुरत मगरा एहदा डोगरी च अनुवाद प्रसारत कीता जाहग जिसी तुस रातीं 8 बजे इक बारी परतियै बी सुनी सकदे ओ।

<><><><><><>

USB-Pen Drive

साइबर सुरक्षा ते सरकारी आंकडत्रें दी संवेदनशीलता ते उंदी हिफाजत गी यकीनी बनाने दे मकसद कन्नै जम्मू-कश्मीर सरकार यू.एस.बी ते पेन ड्राइव्स दे दफ्तरें च इस्तेमाल पर फौरी पाबंदी लाई दिती गई ऐ। पाबंदी च सिविल सचिवालय गी बी शामिल कीता गेआ। सब्भनै मैहकमें गी आखेआ गेआ जे Gov Drive मंच पर डाटा स्टोर करन ते उसी सांझा करन। जेकर कुसै स्थिति च पेड ड्राइव गी इस्तेमाल करना पवै तां फी एहदे लेई औपचारिक अनुमति लैनी होग। जीएडी नै अधिकारिणं गी आखेआ ऐ जे ओह <https://govdrive.gov.in> दा इस्तेमाल करन। आदेश च आखेआ गेआ ऐ जे जेकर कोई इस हुकम दी खिलाफवर्जी करदा ऐ तां फी ओदे खिलाफ सख्त कार्रवाई कीती जाग।

<><><><><><>

KV-Ramkot

जम्मू-कश्मीर च शिक्षा दे खेतर च इक महत्वपूर्ण पैहलकदमी तैहत केंद्री विद्यालय संगठन दे केंद्री अधिकारियें इस बारे थमां कठुआ च केंद्री विद्यालय रामकोट च शैक्षणिक सत्र शुरू करने लेई मंजूरी देई दिती ऐ। केंद्री मंत्री डॉ. जतिंद्र सिंह होरें इस बारे खुशी जाहिर करदे होई इक सोशल मीडिया पोस्ट च आखेआ जे एहदा श्रेय विधायक सतीश शर्मा हुंदी अगुवाई च मकामी नुमाइंदें आसेआ मंग करने गी लगातार कीते गेदे जत्नै गी गै जंदा ऐ जे लम्मे चिरें मगरा एह मंग पूरी होई ऐ। उन्नै इस मंजूरी गी खिते च गुणवत्ता आहली शिक्षा दी उपलब्धता सब्भनै तगर यकीनी बनाने लेई इक महत्वपूर्ण गैस करार दिता ऐ।

<><><><><><>

Ramban-Seri Deptt.

रामबन जिले च रेशम दे कीड़े पालने सरबन्धी मैहकमे आसेआ मकामी करसानें, जनजातीय समुदाय ते खास तौरा पर महिलाएं गी इस क्षेत्र कन्नै जुड़ी दी गतिविधियें कन्नै जाइने आस्तै लगातार जत्न कीते जा'रदे न। जिले च समग्र कृषि विकास कार्यक्रम तैहत नियमित तौरा पर जागरूकता कार्यक्रमें दा आयोजन कीता जा'रदा ऐ तां जे रेशम दी खुबटियें दी बेहतर सांभ-समेयाल, उत्पादन ते होरनी गतिविधियें बारे सिखलाई देइयै करसानें दी आँदन च बाददा कीता जाई सकै। इस बारे होर जानकारी दिंदे होई जिला सेरीकल्चर अधिकारी संजय रोहमेत्रा होरें आखेआ।

<><><><><><>

Weather

मौसम विभाग नै 27 अगस्त तगर जम्मू, रियासी, उधमपुर, साम्बा, कठुआ, रामबन, डोडा, किश्तवाड़ ते राजौरी च भारी थमां मती भारी पौने दी पेशगोई कीती ऐ। इस्स दौरान बद्दल फट्टने, चानचक्क हाड़ औने, ल्हास-पस्सियां पौने ते हेठले इलाकें च पानी कट्ठा होने दी भविक्खवाणी कीती गई ऐ। प्रशासन नै लोकें गी सौहगा ते सतर्क रौहने ते ऐहतियाती उपाऽ करने दी सलाह जारी कीती ऐ। लोकें गी हाड़ें दी शेंका आहले इलाकें ते हेठले मैदानी इलाकें च मती सतर्कता बरतने लेई आक्खेया गया ऐ। कुसा बी आपात स्थिति दरान लोक 112 नंबर पर मदद आस्तै फोन करी सकदे न। तोआई, जम्मू संभाग च बने दे माड़े मौसमी हालात दे मददेनजर जम्मू खिते दे सब्भनै निजी ते सरकारी स्कूल अज्ज बंद रक्खे गे। मौसम विभाग आसेया चेतावनी दे चलदे औंदे कल भी स्कूल बंद रक्खे जाडन। भारी बरखें दे मददेनजर विद्यार्थियें दी सुरक्षा गी ध्याना च रक्खदे होई स्कूली शिक्षा निदेशालय जम्मू नै ए गें पुट्टी ऐ।

<><><><><><>

PTC-Announcement

आकाशवाणी जम्मू दे क्षेत्रीय समाचार एकांश आसेआ जम्मू जिले लेई अंशकालिक संवाददाता यानि PTC लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बश्कार ऐ ते ओह जम्मू जिले दा रौहने आहला ऐ, एदे लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोइचदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंधत लोइचदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोइचदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू च 31 अगस्त 2025 संजा 6 बजे कोला पैहले- पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>